



*Moyse âgé de trois mois, est mis à l'abandon du cours de l'eau ; & est trouvé par la fille du Roy, qui le fait nourrir.*

**P**OUR empêcher l'accroissement des familles d'Israël, Pharaon commanda aux Sages-femmes, que tous les enfans masles qu'elles receuroient des femmes des Hebreux, fussent iettez en la riuere : mais elles n'en firent rien, car elles auoient la crainte de Dieu, & s'en excuserent. Toutesfois Pharaon commanda au peuple de mettre à mort tous les masles, reseruant les femelles seulement. Et lors vn de la maison de Leui prit vne fille de sa lignée, laquelle conceut & enfanta vn fils, & le voyant fort beau, le cacha par trois mois ; mais ne le pouuant plus celer, fut mis en vn coffret de jonc enduit d'argille & de poix, & fut posé en vne rauziere auprès du fleue. Or la sœur de l'enfant épioit de loing que deuiendroit l'enfant, laquelle vid la fille du Roy se venant esbatre, & lauer au fleue, qui trouuant l'enfant qui pleuroit, en eut compassion, & dit : Cét enfant est des Hebreux, ie le veux faire nourrir ; & lors la sœur s'aduançant, dit ; Madame, iray-je querir vne nourrice ? & elle luy dit, Va ; & elle appella sa mere, qui fut ioyeuse de le nourrir avec salaire, & depuis estant grandet, le mena à la fille du Roy, qui l'adopta pour fils, & le nomma Moyse, c'est à dire, sauué des eaux.

*Exode 1. & 2. Chap.*